

中國方志叢書·華中地方·第八五八號

據

清·黃濬·宋惟駒等纂修
清道光十年刊本

影印

江 西 省

雩都縣志

(三)

成文出版社有限公司印行

零都縣志卷二十二

人物志

名臣

明

郭端

郭端字季正幼奇敏日誦數千言下筆能與古人抗
衡永樂乙酉以貢入太學授行人司行人壬辰選御
史巡按廣東時鎮守大璫雷春恣睢殺人莫敢忤
總兵尚書以下皆俯首唯命端列其罪狀飛章劾之
竟置於法靖江輔國將軍陰謀不法端以其事聞遂

伏奉文皇帝下詔褒之時雲南鹽法不清乃遣使馳召端回京欽諭協同大監某給事中張縉巡効滇南鹽政既至剔清夙弊凡所措施皆井井有條貫畢事還朝適有假御史蔣得中迭擾閩廣湖湘間嚴旨緝之不獲廷共推端遂捕得之於延平上悅賜鈔賞勞時安南初定朝廷嘗有南顧憂欲簡才臣監軍并巡視兩廣交趾地方特旨簡端賜璽書督同總兵官桂征夷將軍印新城侯張輔西平侯沐晟豐城侯李彬雲陽伯陳旭統攝三軍屯營禦侮端連疏懇辭上不允欽諭之曰自太監總兵三司群僚聽汝考効端拜

命之後益勵厥職由是遍歷兩廣巡視交趾折豪強
雪冤抑釋管福亮陳道謙熊朝政於樂平辨陳勉李
旭之無罪外不避勢內不避嫌驄馬所至墨吏債帥
莫不聞風膽落焉西平侯沐晟作詩誦之曰青驄馬
肥霜蹠輕金環玉轡下神京長安道上看旌節監軍
鐵面南征行威風凜凜兮號令明吐虹霓兮斬蛟鯨長
驅直入交州城秋毫無犯歌太平魑魅伏鬼神寧功
宗定海字清二十四考中書令子孫世世終當承永
樂十九年赴京考績以最進階奉議大夫僉山東按
察司事歷三載昭皇帝在青宮聞端勞勩夙著乃簡

在廷以新官替回抵京適值洪熙改元之初召見便殿溫旨留用給牌隨侍未幾昭皇帝上賓丙午宣宗即位改交趾僉憲交夷叛服不常廷議欲罷兵明年丁未適黎利遣人送安南王三世孫陳暲表乞立爲陳氏後上乃遣工部尚書羅汝敬齎詔冊封暲爲安南王并勅班師將及境總兵成山侯王福太監山壽海島都督馬英連帥司馬戈謙憲使楊時習御史周岐後給事中郭永清暨端預出境迎使先期三日而後至汝敬以迎詔後期上狀通與端等皆逮繫端在獄九年讀書之外賦詩自樂至宣德十年始蒙恩宥

復原官端旣出乃得與妻子復聚於京邸旋得疾臨終家人問遺言端曰幽繫九年聖恩未報無以見文皇仁宗於地下言訖而卒旅櫬將南歸都憲陳勉撫棺大痛曰吾爲國家惜老成非以哭其私也都御史孫曰良曰郭公以宏博之才卓絕之行立朝爲名御史僉憲山東安南爲名憲司旬宣茂績炳耀遐荒屢獲九年功業未竟同時逮繫者後多以功名顯而公不幸死矣後吉水解縉過雩爲匾兩道風霜於其門

袁慶祥

袁慶祥字德微號崖松晚年自稱野翁父端順慶款

授慶祥生而穎異有大志博綜羣書文章渾雅博大
有先秦西漢風宇法道勁性剛正深嫉逢媚心所否
者雖權力不能奪成化戊子領鄉薦入太學歷事內
府上書陳五事一曰省國費以節民用二曰嚴選舉
以重守令三曰修武備以防邊患四曰存公道以守
國法五曰起民望以惜才能稿成衆皆爲慶祥危共
諷止之不聽曰苟利國雖死不恤疏竟上憲宗御文
華殿召通政司官逮慶祥至東華門待罪內官懷恩
傳奉廷杖八十及半幾死值奉天門災復奉旨免疏
竟留中次日宣吏部查例欲選邊方而銓宰意在保

全覆疏本生歷事未滿不應選用奏旨發回本監肄業祭酒周洪謨耿裕丘濬共書一蔡貫日語旌之成化戊戌登進士第授直隸潛山知縣潛山人曰是嘗廷論刑部尚書董芳者也吾儕敢輕犯令公法耶咸相戒不敢爲不法事訟息庭閒鳩巢廳事馴擾飛鳴士大夫作瑞鳩篇以紀其事時流寓妖僧演術惑衆公緝獲之立斃杖下中官馬某奉命往江浦恃權恣睢道經潛山慶祥不爲禮從者鞭笞胥役怒及長官中官笑曰此縣官廼往日打不死袁秀才也歛威而去慶祥迎送止投一簡而已街婦夜績姑語媳曰寒

甚可斟瓶酒消之媳如言酌酒進姑曰酒甚清好似
袁縣官夜卒聞之聲言於衆事傳京師南撫王恕特
薦陞北刑主事慶祥在部廉明仁恕小大之獄咸求
其情時有近倖坐法方畏推勘慶祥毅然成其獄大
司寇何喬新侍郎彭韶驚服之廣西幽獄柴岳等一
卷終年未定一訊決之卒甦岳等而加誣主罪叅及
問官何喬新特疏旌異欽命總讞十三司刑獄事論
及刑書則危疑交迫每以宋歐陽公典獄事比之在
部四年奏最晉階承德郎會兩廣寇亂廷議推公鎮
撫其地遂陞廣東按察司僉事奉勅提督廣湖南韶

等府兵備時後山賊首林大蒲刼殺官兵爲地方患
慶祥至申明賞罰訓練士卒部署將校久之曰可以
用矣乃擐甲躍馬親督將士一戰而討平之明年斬
增城賊吳永通等五十餘級降其黨五百餘人斬惠
州賊首黎官愛等八百餘級撫散脅從者五千餘人
潮陽童廣英僭稱亞王哨衆數千及羊咄石等十餘
處俱次第撲滅高州大桂山賊衆踞險跳梁慶祥易
服潛行察其嚮導伏精卒數處一鼓破之賊驚爲神
又慮後山白水爲賊舊巢要徑乃調議從化馬田增
城河源等處撥兵規畫招集流移題建龍門新寧二

縣扼其喉吭捐俸改修英德程鄉興寧三縣學宮廣其教化遂令綠林與窟化爲鄒魯禮義之區白沙陳獻章大書嶺海澄清四字以賀御史熊達以望推慶祥進表廷論平寇開疆之績敬皇帝賜織金文綺二端宴光祿寺方應顯擢有忌其剛直者將撫他事阻之慶祥慨然曰節鉞之榮何如舞綵之樂也遂以親老連疏乞休帶銜致仕毅皇帝登極追叙前勲部以慶祥功上遂得膺恩晉階朝列大夫正德己卯宸濠叛欲起義兵討逆因昔年廷杖股肉碎裂老復痛苦乃上王守仁進勦方略王多遵服之家居足跡不履

公府事二親孝敬無間胞弟五人怡怡田廬間日與
同里耆宿盤礴泉石寄情酒筒詩瓢間者三十年年
八十一卒所著崖松集歸來稿讀史錄古今雜議藏
於家羅洪先曰予嘗過雩耳袁公事甚悉因嘆曰浩
然之氣上爲日星下爲河嶽貫萬古而不朽者也昔
人慷慨一時淹沒後世氣餒故耳公初以孝廉扶持
國是逆鱗抗疏幾殞身而弗恤繼秉節鉞清海宇肅
嵐煙開闢疆土紓天子南顧憂急流勇退解組養親
剛介之志金石不渝風節所垂百世具瞻真盛世君
子也

李涑

李涑字源甫自幼岳立家貧刻苦讀書屏跡羅巖屢月不至城下爲文能自豎一家督府吳興陸公輒稱曰奇才奇才嘉靖丁卯舉於鄉辛未登進士授寶應令寶應故水鄉會大水田廬蕩析一望皆白涑自攜蔬糲循行阡陌間踐冰霜沐風雨衣敝面垢不顧壑闕疏濬不遺餘力民賴以生活涑父鈞至寶應視涑時涑所入俸盡市穀飼餒人囊無一金强市肋肉爲供鈞曰兒爲官日蔬食我今尚田父也乃肉食耶揮去之父子共薇蕨而食寶應人至今尚能言之七年

赴召老穉攀轅遮哭送至數百里貯水一罌獻之謂
令公廉如水也久之乃建祠生祀焉丁丑拜戶科給
事中江陵相不喪父而充大婚冊使因抗疏言禮重
大婚爲母儀天下宗社萬年計奈何令新喪斬焉輟
哭將事乎易服則非情喪服則非禮且國家非有兵
戎計謀欲借輔臣決策上左右亦豈乏一二足使者
臣愚以爲是可已此不可已將無所不已止之便疏
入上遣司禮監馮寶傳諭元輔昨李涑說大婚禮不
宜命先生供事這廝卻不知出自聖母面諭朕先生
盡忠盡不得孝重其事纔命上公元輔執事行禮先

生豈敢以臣下私情違誤朝廷大事次日奉旨朕面奉聖母慈諭大禮遣命元輔欲重其事豈敢有違李涑這廝乃敢借言離間欲阻成命好生欺肆且不究着該衙門知道時居正手疏目吏部曰諸狂童方逐何得留此狂奴難我吏部懼不能對會涑復上言四方水旱歲不登不宜令尚方將作鉤盾諸臣作淫巧以損上儉德廷臣迎元輔意遂出爲山東僉事再遷廣西叅議居粵西四年嚼檠飲水一如寶應提綱飭紀未始一日懈弛江陵敗進憲副飭蘇松四郡兵事諸役迎者至雪見敗廬數椽蟻垤近席飯疏衣褐蕭

然寒士歸語太原相公太原相公嘗津津稱述以勗
居官者甫兩月聞封翁訃即日徒跣歸哀毀骨立旣
塋廬墓下免喪再補舊地歲飢奏記兩臺請蠲請賑
灾眚俱蒙實惠又著經賦一書欺隱飛灑之弊盡爲
搜剔已超拜中丞撫江南十郡裁革供帳捐斥浮靡
一意務在拊循而又以餉籍屬兵使者司出納秋毫
無所與即吳中兩政府在朝未嘗及門施一幣有司
以豎枋請第曰歲不稔未遑也先後在吳五年所御
一冠一衿一布被不更置郡邑亦無敢以一登豆薦
者郭子章嘗言今天下稱清德者不乏而情貌相副

始終一致則惟李中丞一人以母老乞養奉旨予告
既歸日愉愉奉母孺人懽月會邑中同志講明朱子
德性問學之旨嘉惠後學文章原本性命雖談笑題
咏皆闢理道癸巳起撫保定提督紫荆等關念太孺
人春秋高力辭不就家居每食惟煮豆爲下箸物惟
敝不能更製糊紙補之庚子居太孺人喪四方來弔
者至不能治蔬具麻衣籃縷朝夕不解遂抱痛致疾
未及禫服而卒萬厯三十五年督學副使姜檄郡邑
有司崇祠鄉賢所著奏議文集語錄藏於家

前志論曰李中丞德業在三吳兩淮至今兩地人